



Na.35. Msimu wa Kilimo 2022/23

Tathmini ya Septemba 11-20, 2023 na Matazamio kwa Kipindi cha Septemba 21-30, 2023

MUHTASARI

- Mvua zinazotarajiwa katika maeneo ya Kanda ya Ziwa Victoria, magharibi mwa nchi na nyanda za juu kaskazini zinatarajiwa kuongeza unyevunyevu katika udongo.
- Wakulima katika maeneo yanayopata mvua za Vuli wanashauriwa kuendelea na maandalizi ya mashamba kwa ajili ya msimu wa kilimo unaotegemea mvua za Vuli.
- Jamii inashauriwa kuendelea kutumia maji yaliyopo kwa uangalifu kutokana na hali ya ukavu inayorndelea hususan katika maeneo yanayopta mvua mara moja kwa mwaka.


MIFUMO YA HALI YA HEWA KATIKA KIPINDI CHA SEPTEMBER 11-20, 2023

Kipindi hiki, migandamizo mikubwa ya hewa iliyopo kusini mwa dunia lilipungua nguvu wakati ile iliyopo kaskazini iliendelea kuimarika. Hali hii iliendelea kuusukuma ukanda mvua (ITCZ) kuelekea kusini mwa ikweta hadi katika maeneo yaliyopo kaskazini mwa nchi hususan maeneo ya ukanda wa ziwa Victoria na magharibi mwa nchi.

Joto la bahari la juu ya wastani lilikuwepo upande wa kusini mashariki mwa bahari ya Atlantiki (karibu na pwani ya Angola) na hivyo kuwa na mchango hafifu katika kuusukuma upepo wenye unyevunyevu kuvuma kutoka misitu ya Kongo kuelekea Magharibi mwa nchi

TATHMINI YA MVUA KATIKA KIPINDI CHA SEPTEMBER 11-20, 2023

Katika kipindi hiki, maeneo mengi nchini yalikuwa makavu, isipokuwa kwa baadhi ya maeneo ya kanda ya ziwa Viktoria, magharibi mwa nchi, na maeneo machache ya nyanda za juu kusini magharibi, magharibi mwa mkoa ya Arusha, mkoa wa Dar es Salaam pamoja na kisiwa cha Unguja ambayo yalipata mvua.. Hata hivyo kuna maeneo machache ambayo yalipata mvua nyingi zaidi kati ya milimita 20 hadi 100 kama inavyoonekana katika Kielelezo.



Kielelezo: Kiasi cha mvua cha Septemba 11-20, 2023 kama kilivyokadiriwa na satellite (RFE)

TATHMINI YA HALI YA KILIMO KATIKA KIPINDI CHA SEPTEMBER 11-20, 2023

Katika dikadi hii baadhi ya maeneo nchini yalikuwa makavu kwa ujumla. Hali hii iliathiri upatikanaji wa maji, hata hivyo ilisaidia katika shughuli za uandaaji wa mashamba.

Baadhi ya maeneo katika ukanda wa Ziwa Victoria na magharibi mwa nchi yalipata vipindi vya mvua na kusaidia kuongezeka kwa unyevunyevu katika udongo na kuota kwa majani kwa ajili ya mifugo na wanyama.

Kwa ujumla, katika maeneo yanayopata mvua za vuli wakulima waliendelea na uandaaji wa mashamba kwa ajili ya msimu wa kilimo wa vuli.

Upatikanaji wa maji na malisho kwa ajili ya mifugo ulipungua kutokana na hali ya ukavu inayoendelea katika maeneo mengi ya nchi.

**HALI YA MAJI KATIKA KIPINDI CHA
SEPTEMBER 11-20, 2023**

Kwa ujumla kina cha maji katika mabwawa na mtiririko wa maji kwenye mito vimeendelea kupungua katika mabonde mengi nchini kutokana hali ya ukavu inayoendelea.

**MIFUMO YA HALI YA HEWA
INAYOTARAJIWA KATIKA KIPINDI CHA
SEPTEMBER 21-30, 2023**

Katika kipindi hiki, migandamizo mikubwa ya hewa iliyopo kusini mwa dunia inatarajiwa kuendelea kupungua nguvu wakati ile iliyopo kaskazini inatarajiwa kuendelea kuimarika. Hali hii inatarajiwa kusababisha ukanda mvua (ITCZ) kusogezwa kuelekea kusini mwa Ikweta na kuwepo katika maeneo ya ukanda wa Ziwa Victoria na magharibi mwa nchi.

Joto la bahari la juu kidogo ya wastani linatarajiwa katika eneo kubwa la bahari ya Hindi, hali hii inatarajiwa kuendelea kuusukuma upepo wenye unyevunyevu kutoka bahari ya Hindi kuelekea katika maeneo ya ukanda wa pwani.

**HALI YA HEWA INAYOTARAJIWA KATIKA
KIPINDI CHA SEPTEMBER 21-30, 2023**

Maeneo ya kanda ya Ziwa Viktoria (mikoa ya Kagera, Geita, Shinyanga, Mwanza, Simiyu na Mara) na magharibi mwa nchi (mikoa ya Kigoma, Katavi na Tabora) yanatarajiwa kuwa na mvua na ngurumo katika maeneo machache.

Maeneo ya nyanda za juu kaskazini mashariki (mikoa ya Arusha, Manyara na Kilimanjaro) yanatarajiwa kuwa makavu kwa ujumla, hata hivyo maeneo machache yanatarajiwa kuwa na vipindi vifupi vya mvua nyepesi.

Pwani ya kaskazini (mikoa ya Tanga, kaskazini mwa mkoa wa Morogoro, Pwani na Dar es Salaam pamoja na visiwa vya Unguja na Pemba) inatarajiwa kuwa na mvua nyepesi katika maeneo machache.

Kanda ya kati (mikoa ya Dodoma na Singida), nyanda za juu kusini magharibi (mikoa ya Rukwa, Songwe, Mbeya, Njombe na Iringa), pwani ya kusini (mikoa ya Mtwara na Lindi) na kanda ya kusini (mkoa wa Ruvuma na kusini mwa mkoa wa Morogoro), maeneo haya yanatarajiwa kuwa na hali ya ukavu kwa ujumla.

**HALI YA HEWA KILIMO:
MATARAJIO NA USHAURI KATIKA
KIPINDI CHA SEPTEMBER 21-30, 2023**

Mvua inayotarajiwa hususan katika maeneo ya kanda ya Ziwa Victoria na magharibi mwa nchi zitasaidia kuongeza unyevunyevu katika udongo.

Wakulima katika maeneo yanayopata mvua za Vuli hususan ukanda wa ziwa viktoriana magharibi mwa nchi wanashauriwa kuendelea na shughuli za kuandaa mashamba na kupanda pale wanapona unyevu wa udongo unatosha kuotesha mbegu.

Wavuvi wanashauriwa kuendelea kufuatilia taarifa za hali ya hewa za kila siku, hususan kwenye bahari ya Hindi na maziwa makuu ili kufanya maamuzi juu ya wakati sahihi wa kwenda kufanya shughuli za uvuvi kutokana na hali ya upepo inayojitokeza mara kwa mara.

Kutokana na hali ya ukavu inayotarajiwa katika maeneo mengi nchini, wafugaji wanashauriwa kutumia maji na malisho yaliyopo kwa uangalifu.

**HALI YA MAJI INAYOTARAJIWA KATIKA
KIPINDI CHA SEPTEMBER 21-30, 2023**

Kina cha maji katika mabwawa na mtiririko wa maji kwenye mito vinatarajiwa kuendelea kupungua kutokana na hali ya ukavu inayotarajiwa katika maeneo mengi nchini. Jamii inashauriwa kuendelea kutumia maji yaliyopo kwa uangalifu kufuatia kuendelea kwa msimu wa ukavu katika maeneo mengi nchini.